

續行水金鑑

地710

2254-2

印三:31



續行水金鑑卷第五十八

淮水 章續七



乾隆五十年四月薩載李奉翰奏奉

上諭朕恭閱

實錄康熙四十年五月泗州等處被水

諭大學士等曰六壩堵塞其水必然注彼治東則西卽被災兩方之民俱同一體朕閱河工時見高家堰之水較隄旁平地高三尺淮安之水較地高九尺今高家堰之水高於地已至一丈六七尺豈不可危朕日夜念此甚切憂懼高家堰隄作何保守堅固或另有修治善策著張鵬翮陳奏欽此煌煌

續行水金鑑卷五十八

淮水 一

聖訓仰見

宵旰勤思爲澤國民生求保障安全之計疇咨深切朕思高堰隄工自雍正年間改建輒工較前已爲整瞻朕屢次親巡閱視規畫講求命一律建築石工以期堅緻鞏固並酌定五壩水誌以時宣洩俾盛漲時湖水不致闕壅爲患立法已極周詳而自陶莊挑放引河以來河勢趨北今昔情形不同現在高家堰之水較地尙高若干尺淮安之水又高於地若干是否因隄工堅固及宣洩機宜周備妥善湖水不致爲患之處著傳諭薩載李奉翰詳悉查明據實具奏並繪圖貼說呈覽欽此臣等督飭道將廳營前赴高家堰武家墩并淮安一帶逐

細查探較量目下洪湖及運河水勢正極小之時高家堰誌椿此時存水二尺四寸大隄高於水面一丈六尺六寸高於平地一丈七尺六寸內外比較現在高家堰湖水計高平地一尺淮安運河中泓現深一丈四五六尺不等大隄高於水面一丈三尺四寸高於平地一丈五寸內外比較現在淮安隄內平地計高運河之水二尺九寸查洪湖上承七十二山泉之水匯爲巨浸高家堰大隄爲淮揚兩郡保障從前隄身單薄淮揚頻罹水患康熙四十年修築高堰堵塞六壩雍正八年增修輒工自乾隆十六年至今仰蒙聖主親臨閱視

指示機宜於十八九二十三及四十五六九等年不惜帑金修築石工數次改輒工爲石工並將土隄子堰增培高厚其天然壩永禁開放仁義禮智信五壩相時宣洩並

欽定水誌於伏秋湖水盛時大展清口俾湖水暢出歸海少由滾壩洩入高寶諸湖節宣有制高郵南關車邏等壩免於啟放下河數州縣沮洳之區盡成沃壤再四十二年間挑陶莊引河後黃水不復倒灌運河全係清流河身較前刷滌寬深洪湖卽遇盛漲不致驟壅爲患淮揚士庶共慶安全而臣等身任河防實深欣幸惟有稟遵節奉

諭旨指示機宜永遠遵守以期萬年鞏固

南河成案

七月李奉翰奏奉

上諭洪澤湖所存底水太少自不免湖底淤墊萬一秋
雨不時淮水長發恐不能容納所有高堰各工務宜加
意防護其清口東西壩著照所定水誌如應開壩時卽
行酌開宣洩總應先事講求預備斷不可因此時水勢
消耗稍存疎忽大意仍著迅速覆奏等因伏查洪澤湖
上年僅存底水二尺四寸本年春夏以來因雨澤稀
少湖水漸消湖身早已騰空足資容納前據正陽關
委員稟報淮水於七月初六日起至十二日止已陸
續長水四尺二寸下注洪湖又因黃河水長逾誌臣

續行水金鑑卷五十九

淮水三

等照例將毛城鋪峯山閘次第開放分洩由濰河五
湖下達亦歸洪澤湖是以洪湖內高堰誌椿於七月
十八九日以後已陸續長水一尺五寸現雖尙未暢
出而通湖引河臣等業已派員疏浚預備如水勢加
長迅卽將清口東西壩酌量拆展以資暢洩旣可保
護堰盱工程更可刷深河渠再爲隨時奏

聞南河成案

八月初十日薩載李奉翰奏初四日奉

上諭據毓奇等奏分派截留漕船事宜所辦甚是著卽
照所請分撥截留俾漕艘及早歸次受兌以免長途牽
輓之勞至摺內稱淺滯在清口之饒州承建等幫現有

圈堰戽水設法推拉擬將米船全數起空俟推活得水再將米石復載原船挽回三閘守候齊幫南下等語看來現在清口糧艘淺擱來往俱不能行動殊屬不成事體清口阻滯乃淮水微弱停沙淤淺乃偶然之事自六月二十八九等日至今已逾一月何以尙形淺滯况前據薩載等奏報七月初四日以後黃水盛漲淮水亦陸續增長下注洪湖而清口仍然淺滯殊不可解該督等專司河務目擊情形豈竟一籌莫展耶薩載李奉翰不早建閘坐貽誤於前若再不設法辦理將清口疏浚深通致誤新漕恐該督等不能當其咎也著薩載李奉翰將清口何以淤阻如此之久究竟作何籌辦之處迅速

明白回奏欽此遵

旨寄信前來臣等跪讀之下不勝惶悚伏查清口一帶前於六月下旬黃水陡落停淤江西幫船渡黃濡滯江西漕船一十三幫計六百二十八隻內饒州永建等幫一百二十七隻實因六月內挽出運口於東西壩內外及太平河內靠崖停泊守候渡黃不意水勢陡長陡落兩腮沙淤各船被阻擱灘中流水勢尙深大小船隻仍屬通行是以後來各幫仍出運口陸續渡黃迨至上月二十三日奉到

諭旨以江西漕船於是月中旬尙淺滯清口月內必不能全行攢入東境令卽截留黃河以南其時江西船

內已經渡黃者二百三十六隻未經渡黃者三百九十二隻內二百六十五隻原在水深處停泊者先令挽進運口順流南下於沿途各水次交卸回空其淤滯饒州等幫船一百二十七隻臣等帶同道將廳營等并多募人夫在兩岸灘上圈堰戽水推拉刨挖溝槽推至深水處加夫挽拽計已挽進運口南下船七十九隻僅存江西幫船四十八隻此外尚有杭州四幫船二十隻因米石截留安省以爲賑糶之用現於裴家場引河內停泊交卸亦有淤淺仍設法辦理不使久停其清口淺阻緣本年自伏徂秋淮河僅於上月初旬後長水四尺二寸迨後有消無長惟藉上游

啟放毛城鋪天然閘峯山閘等處洩黃助清匯注洪湖近日高堰誌椿始陸續加長至二尺八寸較上年此時湖水尙小七尺餘寸是以不能由五道引河暢出刷沙伏思臣等前於邳宿運河內未能早建閘座業已貽誤於前再不設法籌辦將來致誤新漕獲咎更深惟先將所剩淤淺之船全行推拉入於中泓開行南下俾得早回水次此時清口一帶水勢愈深往來舟楫如常浮送惟兩岸淤沙較厚督令兵丁相機挑切並將通引河頭煞壩再加挑浚深通以備湖水增長蓄高卽行啟放以濟回空以利新漕而兩腮積淤亦可滌刷淨盡

是日薩載等又奏臣等正在繕摺覆奏間復奉

上諭昨因清口淤滯漕艘淺擱來往俱不能行動甚屬不成事體已有旨諭令薩載李奉翰查明據實明白回奏矣前據薩載等奏報洪湖內高堰誌椿於七月十八九日以後陸續長水一尺五寸現雖尙未暢出而通湖引河業已派員一律疏浚如水勢加長迅速再當遵照欽定水誌將清口東西壩酌量豫爲拆展以資暢洩等語淮水既有日長之勢該督等方將拆展清口東西壩以資宣洩何以漕艘往行淺滯如此之久殊不可解至清口自本年三月以來屢行淺阻朕展轉思維推求其故或係清水微弱不能暢出或又因黃水倒漾水退沙

續行水金鑑卷五十六

淮水六

淤以致舟行滯擱均未可定該督等從未奏明是何故也朕於此事深爲懸注該督等斷不可稍存回護著卽將清口究竟何以如此淺阻及作何設法籌辦俾一律深通之處據實迅速具奏欽此仰見

聖主廑念湖河

垂詢殷諄至意伏查洪澤一湖每年伏秋大汛淮水長發高堰誌椿長至一丈三四尺最小亦有八九尺不等卽至冬間誌椿存水總有四五六尺力足抵黃清口一帶久無倒漾之事去年秋冬暨本年春夏因各處雨水稀少淮河總未發水洪湖內誌椿上所存底水二尺四寸亦漸次消落然六月以前止於彭家馬

頭清黃交匯之處少停梗阻黃水未經漾入清口直至六月下旬黃水陡長始行內漾數日間兩腮卽有停淤并驟長驟消江西幫船竟至淺擱裏河內亦經黃水漾注臣等勘明糧船淺滯情形一面奏聞一面因淮水未長每日親詣淮瀆廟虔誠祈禱并委員前赴洪湖中盱眙縣所屬龜山淮瀆廟敬申祭告虔求嗣於上月下旬淮水陸續報長四尺二寸流入洪湖誌椿上僅長水一尺五寸臣等因淮水既有加長之勢湖水或至盛大一經暢出則清口一帶浮沙卽可刷滌淨盡臣等昕夕盼望湖水加增而於歷次摺內並未將黃水倒漾致淺實在緣由詳細陳奏實屬愚

昧今蒙降

旨垂詢曷敢稍存回護伏念淮水未發湖水之小實爲近年罕有臣等廣集衆思竊計黃水霜降後自必退落清口以內及運河兩腮浮沙無礙行舟止須量爲挑切毋庸大辦臣等往來查勘所有通湖各引河一律築壩挑浚俟湖水長發蓄高然後開放俾得暢注敵黃刷沙惟湖內來源不旺現存之水止有此數若秋雨無多上游淮水不大則來春重運仍恐不敷浮送尤關緊要再四熟籌洪湖之西桃源境內臨黃有祥符五瑞二閘亦屬分洩黃水入湖之路本年伏秋黃河盛漲已將毛城鋪等處開放分洩此二閘尙未

啟放該處入湖較近現已一體開放在黃河此時水勢尙大添此一路分減秋汛既可無虞洪湖內增此一處來源又可望其助清濟運所謂急則治標此外別無入湖之路惟盼上游水到由淮達湖則二瀆合流諸歸順境

南河成案

是月十六日阿桂奏本日由驛遞到欽奉

諭旨據薩載李奉翰覆奏稱六月以前止於彭家馬頭清黃交匯之處沙停淤阻黃水未經漾入清口六月下旬黃水陡長始行內漾清口兩腮皆有停淤江西幫船竟至淺擱裏河內亦經黃水漾注等語是清口淤淺竟係黃水倒漾薩載等前此節次摺內並未具奏直待朕

續行水金鑑卷五十六

淮水八

降旨詢問知不可掩飾始行奏聞此豈皆能瞞人之事何愚至此已於摺內詳晰批示又據稱現在酌放祥符五瑞二閘引黃入湖以爲濟運地步等語黃水挾沙而行今引黃入湖豈能使之停沙別處而獨流清水以助湖水之不足恐將來未必能收濟運之益而湖底先受淤墊之害看來薩載李奉翰於此事竟毫無主張智識昏瞶幾於手足無措必須阿桂迅速前往代爲主持以期補救妥善現在清口已因黃水倒漾淤淺今歲漕運遲滯若不力爲籌辦明歲新漕又將貽誤且該督等啟放祥符五瑞二閘引黃入湖設使湖底淤高更非人力所能挑挖關係甚大著傳諭阿桂不必俟秋審事竣於

接奉此旨後卽行束裝速行啟程直往江南清口一帶
會同薩載等察看情形熟籌妥辦此事務期事事盡善
以資利濟欽此臣前於初十日接奉

諭旨後細思江南清口淤淺關係漕運最爲緊要且轉
瞬新漕尤須預爲籌辦正擬奏明先赴江南查勘辦
理茲接奉

諭旨令臣卽行束裝起程直往江南清口察看情形臣
現定十八日由京起身前往查清口究係因何淤淺
至此薩載等久任河防親身督辦豈得諉爲不知若
該督等此時尙不陳明則臣初到工所一時不能驟
得其竅要措辦仍恐未能周妥上勞

續行水金鑑卷五十六

淮水九

宵旰屢慮捫心何以自安仰懇

皇上先行嚴切飭諭令該督等激發天良將清口究竟
因何受病之處盡行向臣告知如薩載等詳悉言明
臣不能和衷商核私心自用其咎在臣若薩載等始
終隱瞞回護以致查辦舛誤則該督等之咎更無可
追如此則該督等接奉

嚴諭不敢復存掩飾庶臣得其關鍵卽可從此講求設
法熟籌妥辦以資利濟

南河成案

是月二十二日薩載李奉翰奏臣等前奏時逾白露
黃河異漲漸消各工搶護平穩情形一摺內如湖水
盛漲屆應拆展時相機辦理句上奉

殊批若非盛漲過誌不可輕拆湖水之短或舊年爾等收壩畧遲所致乎不可諱飾據實奏來况阿桂去必能查出也欽此伏念本年南河運道淺滯有誤漕艘逆行臣等業已獲咎而清口黃水倒漾臣等又未據實奏聞上廛

聖主南顧之憂智識昏憤實屬無以自解至清口東西壩荷蒙

欽定機宜原視湖水長落尺寸以定拆收丈尺查四十八年東西壩於十月十六日興工收築十一月十七日築竣比時洪湖高堰誌椿存水三尺七寸至年底誌椿上消存水二尺五寸舊年收束壩工臣薩載於

九月下旬自豫回南察看湖水有漸消之勢卽督令廳營趕緊收築做成壩工一百一十三丈時因豫省睢州壩工尙未完竣酌留口門三十丈以備宣洩并將裏河運口迤外兜水壩工照舊補築十一月底臣李奉翰在豫堵築要工事竣回至清口復加察核業將東西壩及兜水壩俱令接築收窄各留口門寬二十丈使層層關束俱於十二月二十三辦竣此時高堰誌椿存水三尺九寸俱經奏明迨至年底春初誌椿上消存水二尺四寸與四十八年存水尺寸相等俱有道廳報案可查臣等斷不敢稍有諱飾自蹈欺罔之罪祇因本年春夏以來各處雨水稀少洪湖

未曾長水高堰誌椿上所有底水二尺四寸又消落無存迨後淮河長水四尺二寸高堰誌椿長水一尺九寸嗣又陸續長水九寸連前共長水二尺八寸臣等於八月初十日奏聞原冀湖水接續加長即可暢出刷淤乃至今並未加長比上年水小四尺餘寸秋令方中湖水未發實由淮水來源較少之故其清口倒漾之處今蒙

欽差大學士公阿桂來南查勘一切實在情形目所共見伏念漕運爲

國家重務臣等惟有盡心會商熟籌妥辦斷不敢隱諱

貽誤有干罪戾

南河成案

續行水金鑑卷五十六

淮水十一

是月二十四日薩載等奏奉

上諭黃強清弱亦從前所有之事卽今歲黃水漲發較盛常年然清口亦何至到漾受淤若此之甚節經降旨詢問該督等總未切實奏明清口淺阻關係明歲新漕若不將受病源委盡行指出從何得其受病根由薩載李奉翰久任河防清口淤墊卽伊二人始終回護所致安得諉爲不知著將阿桂原奏發交閱看該督等務須激發天良將清口淤淺根由據實直陳毋得再存回護一面迅速據實奏聞一面抄錄原奏迎赴途次知會阿桂俾阿桂得以洞悉受病之源從此講求設法辦理薩載等於此事含糊掩飾業經貽誤於前此次降旨詢問

若再不剴切陳明和盤託出尙欲隱瞞回護以致阿桂查辦時不能得其竅要貽誤新漕或別經阿桂查出受病緣由另行具奏恐該督等不能當其咎也欽此臣等查清口爲淮黃交匯關鍵從前易於倒漾自開挑陶莊新河以後黃流直趨北岸並將清口東西壩移下數十丈在惠濟祠下建築足以束清抵黃且於運口外復築兜水壩使之層層關束抵黃有力是以近年鮮有倒漾之事本年洪湖內因淮河自春徂夏並未發水交秋後共長水四尺八寸現在正陽關淮河據報除消落外淨存長水一尺六寸是以洪湖內高堰誌椿僅存水二尺八寸湖水旣小自未能出口抵禦

續行水金鑑卷五十六

淮水 三

黃流以致倒灌入運直達淮揚是本年湖水極小實爲清口淤墊之病根此在高堰及河口一帶一望而知該處又爲南北往來要道臣等旣不能掩飾亦不敢回護臣等雖將太平河裴家場張福口等處通湖引河多派人員上緊疏治但核計湖內尙須長水二尺餘寸方可下注引河抵出清口前經奏請開放祥符五瑞二閘引黃助湖原屬一時不得已之舉而黃水入湖誠如

聖諭難免停沙竊查行水金鑑載康熙十年清口爲黃水灌入裴家場引河悉起油沙天妃閘底淤墊回空糧船不能進口乃於清河縣南岸腰鋪地方開放支

河通連湖內張福口引河等語查清河縣舊縣卽今之玉皇閣工南岸腰鋪卽今之黃河南岸高家灣迤下亦係引黃助清再查乾隆三十六年黃河南岸之陳家道口漫溢大溜下注洪湖由清口而出湖中未嘗積淤皆因經由支幹各河綿遠入湖之水已漸澄清今祥符五瑞二閘本在一處由引河入至湖邊相距有四十里之遙所挾之沙亦不過停於引河兩腮及湖西邊岸湖水浩瀚時卽可刷盡臣等前奏未曾分晰聲明致蒙

聖恩訓飭伏思此事原非善策然舍此別無增益湖水之處統俟

續行水金鑑卷五十六

淮水 三

欽差大學士公阿桂到時再行詳細面商聽候妥酌辦

理南河
成案

九月初三日

上諭軍機大臣等前因桐柏山爲淮水發源特諭畢沅詳晰查勘支流或有淤塞卽應設法籌辦茲據畢沅覆奏該處發源之地河身不甚寬廣易於疏濬儻有須開挖之處卽勘明興工又賈魯惠濟二河卽係淮水支河現在一律疏濬其淮瀆廟已令藩司江蘭虔修祀事等語江南洪澤湖向藉淮水挹注今淮水發源之處經畢沅勘明疏濬將支港小河一律濬導該處賈魯惠濟二河其下流歸併渦河入淮現在亦加疏濬俾就通暢并

於淮瀆虔申祭告自當仰邀 靈佑泉源湧發衆水會
歸下游湖水日就充足得以助清敵黃至淮瀆廟如果
歲久未修或形傾圯卽應覈實勘估動項興修俟廟工
告竣時朕當親書匾額用答

神貺將此傳諭阿桂等並諭畢沅知之

皇帝聖訓 純

河南巡撫畢沅奏賈魯河卽古汴水發源滎陽之大
周山會京索等水經鄭州中牟祥符至朱仙鎮下達
尉氏扶溝西華淮寧之周家口商水項城沈邱至安
徽之潁州正陽關入淮又賈魯河自中牟西十五里
分支爲惠濟河經祥符陳留杞縣睢州柘城淮寧鹿
邑至安徽亳州金陽河入淮各計四百餘里此河淤

續行水金鑑卷五十六

淮水 古

塞爲開封等府屬商販民食攸關今久經淺淤自應
及時開浚且於水旱年時兼資蓄洩從之

皇
朝通典

是月初四日阿桂奏臣奉

命徑至江南清口會同薩載等察看情形熟籌妥辦臣
於八月十八日自京起程九月初二日行抵桃源初
三日清晨由楊莊運口渡黃入清口一帶察看因黃
水倒漾日久東西兩岸淤沙闊十餘丈至數十丈不
等中泓止存數丈河溝一道水深三尺餘寸輕舟往
來尙無阻滯現在黃水日落而測量尙高湖水五尺
餘寸就下之勢不論遠近此黃水倒灌清口淤墊實
在情形也至清口微弱之故實緣春夏以來河南安

徽雨澤稀少濰河並未發水正陽關淨存長水一尺六寸洪湖內高堰誌椿僅存水二尺八寸本年湖水之小爲從來未有不但黃強清弱至六月後清水竟涓滴無出黃水又值盛漲以致倒灌入運下達淮揚是淮水未發湖水極小實爲清口淤墊之由臣沿途察訪到後日覩委無他故查乾隆三十三年三十六年四十二年清口彭家馬頭等處均經淤梗或遇湖水漲發暢注敵黃或減黃出清抑強扶弱浮沙卽衝刷淨盡現在湖內來源不旺存水止有此數急切難望暢出轉瞬回空南下明春重運經臨若不亟爲籌辦必致貽誤臣殫心竭思實深焦灼但自清口以達淮揚停沙數百里若興工挑竣則旋疏旋淤徒費帑金卽薩載等所籌引黃入湖以爲濟運地步此亦急則治標止可取便一時豈可行之數月誠如

聖諭恐將來未必能收濟運之益而湖底先受淤墊之害設使湖底淤高更非人力能挑現在薩載等所開祥符五瑞二閘過水寬不滿五丈深止四尺不能大有裨益而自引河入至湖邊相距有四十里之遙或可不致淤湖且任其權時開放俟黃水消落卽時堵閉惟有急圖收蓄以利新漕稍有實濟至此外或尙有隨時設法調劑之處容臣再行酌籌辦理據實奏

聞

南河成案

是月初八日阿桂奏臣接奉

諭旨據薩載等覆奏清口淤淺緣由稱從前黃河南岸之陳家道口漫溢大溜下注洪澤湖由清口而出湖中未嘗積淤皆因經由支幹各河綿遠入湖之水已漸澄清今祥符五瑞二閘由引河入至湖邊相距有四十里之遙所挾之沙亦不過停於引河兩腮及湖西邊岸等語所奏殊屬自相矛盾從前陳家道口漫水下注洪湖既因經由支幹各河綿遠是以漸次澄清湖中不致淤積今祥符五瑞二閘離洪湖不過四十里相距甚近所挾之沙焉能卽行澄清不致淤墊湖底是引黃入湖未必能助湖濟運而停沙淤滯恐轉足爲淤湖之害薩載

續行水金鑑卷五十六

淮水 六

李奉翰不過因此時別無善策爲此無聊之極思恐伊二人竟茫無主見以致洪湖重受淤墊所關匪細著傳諭阿桂前抵清口後務將伊等所奏情形悉心籌酌爲之主持定議方爲妥善欽此仰見

皇上睿慮周詳無微不至臣抵清口以來業將察看淤淺情形實因湖水極小未能出口抵黃致倒灌入運及現在築壩攔蓄各緣由奏蒙

聖鑒臣初到此間詢商薩載李奉翰及河工員弁等多主引黃灌湖之說查行水金鑑內所載康熙十年清口爲黃水灌入裴家場引河悉起油沙天妃閘底淤墊回空糧船不能進口乃於清河縣南岸腰鋪地方

支河之連張福口者疏濬通舟考其時並未言清水
來源微弱故畧資挹注卽可利濟至乾隆三十六年
黃河南岸之陳家道口漫溢大溜下注淇澤由清口
而出湖中未嘗積淤蓋南岸漫溢黃水俱歸淇湖旣
有大溜下注卽挾沙而行不能停積况當夏秋淮亦
漲發二瀆並行浩瀚有力沙隨水去是以不致淤湖
本年淮水未發湖水極小爲從來未有現在引黃濟
湖亦非善策臣受

恩深重荷蒙委任殫竭心思力求目前補救之法與薩
載等酌籌爲今之計惟有借已灌之黃水以送回空
蓄積弱之清水以濟重運查本年二進糧艘行入淮

續行水金鑑卷五十八

淮水 七

河全藉黃水浮送方能過淮渡黃今按借黃則回空
濟運始此時雖值黃水消落而空船喫水無多設法調劑似可
銜尾遄行至此時湖水旣不能出自應築壩煞住使
之停蓄不復消耗又免黃水入湖淤墊現奉

諭旨令畢沅派員疏濬淮河各處泉源薩載等亦將太
平河裴家場張福口等處通湖引河派夫上緊挑挖
約計明春重運北上彼時湖內自必積水稍多卽可
啟壩下注引河抵出清口刷沙敵黃庶爲有益臣與
薩載李奉翰詳商大局無過於此總之清水一經旺
盛暢出不過數十日內諸凡妥順皆復舊觀無如清
水旣乏來源將屆冬令湖水止有此數斷難望其旺

盛暢出若廣求引黃之路俾灌注入湖待至湖水長發尙有半年安保不逐漸停淤誠如

聖諭未必能助湖濟運而停沙淤滯轉爲洪湖之害薩載等亦知此事原非善策特不得已而爲此舉此時所開祥符五瑞二閘過水寬不滿五尺深止四尺以周圍數百里湖面不致爲些微黃水所淤迨至霜降水落卽不堵閉亦不能過水矣臣等籌議藉黃以送回空蓄清以濟重運詢訪河工大小各員弁僉稱此事稍有把握現在銅鉛船隻陸續出口回空糧船渡黃進口銜尾南行毫無阻滯卽使黃水消落或慮口門淺阻已相度形勢於陶莊河尾迎溜另開口門過水較深四五尺並築兜水壩以蓄其勢現飭工員妥辦豫備臨時調劑至湖水出路自築壩攔截後日內高堰誌椿已長水尺餘距明春重運到淮尙有五月之久冀日漸停蓄再長水二尺餘寸卽可啟壩下注抵出清口刷沙敵黃設或不能長至四尺臣揣度事理亦足浮送新漕不致貽誤可以稍舒

齊旰廛注

南河成案

是月十五日阿桂薩載李奉翰奏臣阿桂自抵清口後察看黃水倒灌雖由本年淮水過弱但豫省南岸連年漫溢黃水悉由淮入湖究恐湖身未免墊高並聞盱眙金家岡一帶淮河內有淤淺處或淮水因之

不能下達亦未可定當卽會同薩載李奉翰前赴堰
盱一帶詳勘查洪湖自西南斜向東北周圍四百餘
里由清口至高堰關帝廟以北二十餘里湖灘本高
又因六月內黃水倒灌五道引河普律受淤不見湖
面迨由關帝廟以南直抵蔣家壩一百餘里則汪洋
無際高堰誌椿係前任河臣李宏奏定維時湖內底
水存有二丈椿底與湖心水面相平椿高一丈八尺
八寸與堰工尺寸相等爲湖水消長之驗上年年底
誌椿所存長水已消落淨盡湖水尙深一二三丈不
等並非湖高不能蓄水猶之正陽關誌椿上現報長
水消落無存而河內尙水深丈餘自七月後淮水稍

長近復將湖水築壩煞住今高堰誌椿已長水三尺
一寸太平河張福口裴家場各引河亦漸次挑竣再
俟湖水蓄高明春重運將到卽可開壩下注清口濟
運又金家岡至大王廟二十餘里因上年七月後上
游一帶未得大雨今歲春夏久晴該處河水止深一
尺一二寸水下均係稀淤臣薩載委員往勘估挑因
水底難以撈濬擬於沿河南岸灘上估挑引河一道
長三千八百三十餘丈以備水小時重運經行濟用
適淮水旋長未及興工茲細加測量金家岡迤西至
打石山河水俱深丈餘大王廟迤東至龜山水深至
三丈以外惟金家岡至大王廟中間水仍止深四五

尺水底稀淤深至六七八尺不等其何以此處水勢較淺並底有稀淤之故臣等體察遍訪緣淮河河身寬窄不一所以水勢各有深淺金家岡雖係淮河舊身而河面寬至十餘里久成湖汊又值安省連年雨少今夏更加早暵該處河水僅深尺餘致重運經臨必需起剝而現在該處河內之水已有四五尺普面皆過重運足資浮送卽從前估挑引河灘上現亦水深二三尺不等無從挑挖復詢土人僉稱淮水盛漲往往漫過岡頂比此時水勢相懸二丈今年五月間淮水之小實所罕見然彼時金家岡河水深尙尺餘空船仍可行走是淮水斷不因此阻遏其河底稀淤

續行水金鑑卷五十六

淮水二十

用篙探試係青灰色並不膠粘臣阿桂前在豫省見開挑引河多係沙土膠泥甚少皆係金黃色間有稀淤性柔且粘簽探不能到底今金家岡一帶河內稀淤深至七八尺而一竿直可到底隨手起竿淤卽淌卸竿上僅存青色爲豫省黃河所無卽詢之南河將弁俱稱江省黃河內亦無此等稀淤其非黃流淤墊可知所有金家岡一帶南灘上前估引河一道原爲利漕起見此時高堰誌椿長水三尺一寸湖水又煞壩閉住該處河身現有水四五尺重運儘可通行毋庸亟籌挑辦但該處河身爲淮水入湖門戶鳳潁各屬漕艘必由此經行今夏已形淺滯設日後偶遇水

落灘露自應仍舊開挑引河庶水小之年重運到此不致起剝亦屬有益至盱眙以上淮水情形適廬鳳道王懿德查災前來臣阿桂面加詢問據稱今夏因淮河水小慮及商船阻隔又經臣薩載委令履勘時正當淮水極小河內偶露一二淤淺或中間稍淤兩旁可以行船或此岸微淺彼岸仍屬深通是以不必挑挖目下臨淮關河內水深丈餘卽前露淤淺各處亦已水深四五尺等語是淮河現在水勢一律深通並無阻滯毋庸大興工作致滋勞費儻將來水勢又形消落露有淤淺臣薩載卽飭地方各官隨時勘報趕緊辦理斷不使入湖之路稍有妨礙

南河成案

續欽定四庫全書

淮水

是日阿桂薩載李奉翰奏臣等接奉

諭旨現在清口旣已淤墊祇可借已灌之黃水俾回空得資浮送俟回空過完卽當築壩令黃水不復倒灌入湖庶湖水日漸停蓄以濟明年重運阿桂卽當相度機宜迅速妥辦俾明歲新漕有益欽此臣阿桂卽與薩載等商酌主持定議將通湖太平各河築壩攔截不令黃水倒灌入湖俾湖水日漸停蓄專藉黃水浮送回空船隻俟回空船過完將黃水築壩煞住不使入運亦卽酌辦臣等稽考舊法惟應藉水刷沙以省人力卽有疏治亦不至大煩工作現在上緊趕辦陸續奏聞俟湖水漸高重運經行先行啟壩下注刷沙敵黃

以資利濟至截留山東回空糧船渡黃進口者已有二百八十餘隻銜尾南行並無阻滯而高堰誌椿又已長水寸餘共存水三尺一寸逐次收蓄可利新漕稍紓

聖主厘念

南河成案

是日阿桂奏臣前奉

諭旨本年洪澤湖水短或因上年清口東西壩收閉稍遲以致洩水過多不能存蓄阿桂到彼應查察實在情形具奏欽此十四日接奉

上諭本年春夏以來既因雨澤短缺湖水甚小六月後清水至涓滴無出薩載等卽應先事豫籌將清口兩壩

續行水金鑑卷五十六

淮水

三

酌量收束以爲蓄水地步何以並不籌及亦並未奏及伊等之意不過以築做壩工未免需費遂爾因循不辦不知彼時築壩所費尙屬有限今黃水倒灌淤沙梗墊始議煞壩蓄水已屬遲誤漕運將來清挖非易所費更屬不貲豈非因小而失大乎是薩載李奉翰於此一事實難辭咎著阿桂查明據實參奏欽此查清口東西壩向蒙

欽定機宜原視湖水長落尺寸以定拆收上年豫省睢工漫溢後洪湖誌椿原長至六尺以上九月下旬督臣薩載自豫回江察看湖水漸消督令廳營收築趕成壩工一百十三丈留口門三十丈至十一月底河

臣李奉翰在豫堵築壩工事竣回至清口又將東西壩接築收窄留口門寬二十丈均經奏明雖本年淮河上游處處被旱湖水異常淺少固非意計所及而上年薩載飭令收築壩工時在九月湖水已見消落卽不應尙留口門三十丈而李奉翰自豫回江時誌椿存水祇有二尺四寸彼時接築收窄亦不應仍留口門二十丈所以誌椿存水至上年年底已消落無存是薩載李奉翰並未於現在情形相機豫籌將清口兩壩再加收束以爲蓄水地步惟冀湖水加長卽可暢出引河濟運及至春夏缺雨淮水並未長發六月以後湖水遂涓滴無出黃水倒灌運道淤淺又不

續行水金鑑卷五十八

淮水

三

隨時實奏恭候

聖明指示其因循貽誤辦理不善之咎實所難辭請交

部嚴加議處

南河成案

是月二十日阿桂奏奉

上諭從來治河之道惟有導清攔黃不使倒灌今轉引黃水入清口以資浮送自屬下策但該處既經淤沙梗塞舍此別無引水善策亦不得不如此辦理然其事究屬可暫而不可久必須設法疏治俾清水日漸旺盛以期暢出刷沙於事方有裨益仍將現在洪湖清口情形迅速覆奏以慰廑注欽此查引黃入運以資浮送不但下策究係無策但當浮沙梗阻清水弱小之時卽多

費錢糧多集夫力盡心挑挖亦隨挑隨淤徒費無益
卽如乾隆三十三年三十六年四十二年清口等處
均經浮沙梗阻連閘背淤平較目今爲尤甚彼時亦
有議施工挑浚者而隨挑隨淤終俟湖水長發暢出
敵黃浮沙卽衝刷無存臣等相度機宜惟應將湖水
蓄高俟明春重運將臨啟壩下注所謂清水刷沙如
湯沃雪不難盪滌盡淨槩復舊規就現在洪湖誌椿
存水三尺而論亦未嘗不可引出清水以濟運道其
所以仍擬俟重運將到時再行啟放者則又以自目
下至桃汛以前皆非淮水加長之時若此時卽行開
放計至明年夏間尙有數月恐至或形短絀故不得

續行水金鑑卷五十五

淮水
蓄

不如此慎重辦理

南河
成案

是日阿桂薩載李奉翰奏查洪澤湖水自築壩攔截
後高堰誌椿現存水三尺餘寸通湖引河又次第估
挑俟湖水蓄高明春重運將臨卽可開放濟運惟舊
設清口東西壩工蓄清敵黃爲全河關鍵該壩原建
於風神廟前距通河各引河尾長四百二十餘丈自
乾隆四十一年開挑陶莊新河後黃流直至周家莊
下注匯清歸海清水出口路長將東西壩移下一百
六十丈於平成臺處建築至四十四年因湖水盛漲
東西兩壩全行展拓迤下河面寬濶水勢紆緩又移
下二百九十丈在惠濟祠前建築以逼清抵黃迨四

十六年冬洪湖水小清口口門收窄後湖水仍見消
落又於風神廟迤上奏添兜水壩工以爲重門關束
使湖水多入運口濟運四十七八九等年將兩層壩
工相機拆築尙屬得力本年湖水過小黃水盛漲清
不抵黃致黃水灌運雖爲近年僅見但黃強淮弱由
來已久自不得不因時制宜於黃水未經倒灌之先
設法抵禦查從前清黃交匯卽在惠濟祠前今黃流
北趨由周家莊下注自通湖引河尾至清黃交匯處
河長一千三百餘丈所設清口東西壩雖較從前已
移下四百五十丈現居適中之地但相距清黃交匯
處尙有五百餘丈似應量爲改移臣等相度現在兜

水壩在通湖引河以下運口以外於束清相宜應照
舊存留加鑲寬厚卽以此壩爲束清壩其舊之有東
西壩應再移下三百丈於福神庵前建設以資禦黃
如遇黃水過大卽將口門收窄不使漾入如遇清水
過大迤下兜水壩相機拆展此壩亦一體展拓俾資
暢洩並將東壩做長以遏黃水圍溜西壩收短使清
水直出抵黃如此則外有東西壩禦黃內有兜水壩
束清今按束清禦黃分設兩壩始此無論湖河水大水小相機拆展
收束均可應手似屬兩益其惠濟祠前現有東西壩
今歲本未拆展查風神廟惠濟祠前一帶從前爲黃
淮並行是以該處河面寬有二百餘丈今黃流北趨

專係淮水由茲東注河面過寬清水益覺無力本年因黃流倒漾清口兩腮俱長淤灘現在河泓寬不過十丈內外將來卽遇淮水長發亦不過刷寬至五六丈儘敷行舟是惠濟祠前之壩不妨存留毋庸拆毀以護兩岸灘崖庶清水多一關束更覺有力足以禦黃刷沙再東西二壩每年恪遵

睿定機宜酌視洪湖水勢大小隨時拆展辦有成規惟從前止定湖水加長拆壩限制其湖水消落應如何按照尺寸收束留存口門若干未曾酌定雖蓄洩機宜原在隨時變通而尋常收蓄亦當議有定制臣等籌酌東西壩口門水深溜激所留不能過窄嗣後應

續水金鑑卷五十六

淮水

三

按照高堰誌椿如湖水消存三尺酌留口門十二丈湖水消存二尺酌留口門八丈庶節宣均屬有制更可永資利賴

南河成案

是日阿桂奏奉

諭旨阿桂籌辦清口情形據稱擬於陶莊河尾迎溜另開口門過水較深四五尺等語清口旣經淤淺又若引黃灌湖自非善策阿桂等相度形勢於陶莊河尾另開口門並築兜水壩以蓄其勢卽使黃水消落日門不致淺阻此亦調劑補救之一法著繪圖貼說呈覽查陶莊新河勢旣收束是以新河內水面比迤下散漫處較高臣與薩載李奉翰酌量相度擬於順黃壩尾稍上

另開口門挑倒鉤引渠一道引黃入運較高家馬頭口門可多過水四五尺卽冬令黃水消落總可過水二三尺爲臨時調劑補救之一法而現在回空船隻仍由原口門行走並無淺阻現在新做口門業已工竣尙未啟放

南河成案 今按 卽此

諭旨內所稱迴龍溝卽此
十一月十二日薩載李奉翰奏外河廳屬清口東西壩爲全河最要關鍵本年因湖水甚小黃水倒漾日久荷蒙

欽差大學士公阿桂來工查勘籌辦與臣等公同相度因時制宜詳晰勘籌以運口外現有之兜水壩爲束清壩其舊有之東西壩應再移下三百丈於福神庵

續行水金鑑卷五十六

淮水 三

前如遇黃水過大卽將口門收窄如遇清水過大將迤上兜水壩拆展此壩亦一體展拓並將東壩做長以禦黃溜西壩收短使清水直出抵黃如此則外有東西壩禦黃內有兜水壩束清無論湖河水大水小拆展收束均可應手舊有之東西壩因黃流倒漾兩腮長淤應聽存留毋庸拆毀以護兩岸灘崖繪圖具奏奉到

硃批再無過此法者矣又移建東西壩分別做長收短句上奉

硃批此法是極欽此欽遵當卽督飭道將等詳細確估查乾隆四十四年移建東西壩於惠濟祠前河面計

寬一百六十八丈水深四五六七丈不等除兩頭築
做鐵心柴土壩基三十三丈並留存口門十六丈外
計做埽工一百一十九丈共用銀九萬八千九百餘
兩今移建於福神庵前河面計寬二百五十八丈較
舊壩基址多寬九十丈但現擬於兩頭先築柴土壩
基共長九十丈寬以十丈爲度兩頭再接做鐵心壩
共長六十丈兩面鑲柴中心填土共寬九丈酌留口
門八丈兩壩中間止須築做埽工一百丈是河面雖
寬而兩頭多做柴土壩中間少做埽工以之相抵約
畧估計所需料土夫工錢糧核與上屆所增無多惟
清口一帶向係行溜大河築做東西壩處水勢較深

續行水金鑑卷五

淮水
五

本年因黃流倒漾該處僅存河泓兩邊俱長嫩淤現
在移建壩工原資禦黃今兩壩築於淤灘之上將來
清黃盛長內外汕刷恐有走塌之虞非刨槽鑲築不
能穩實然此時積淤甚厚亦不能刨如向日河底之
深若俟水長刷沙始行築壩則於束清禦黃均屬不
及自應乘此水勢未發豫爲辦就以資攔禦臣等現
卽酌發正雜料物銀兩督令購集運工驗明動用派
委員弁承辦東西壩各卽開槽照舊壩做法僱築所
用料物逐日稽查儻水勢長發刷動積淤一有蟄陷
卽令隨蟄隨鑲俟蟄定工完後再將所做工段丈尺
用過錢糧核實確估具題

南河
成案

十二月初八日薩載李奉翰奏裏河廳屬通湖引河五道爲淇湖出水尾閘因本年淮水未發湖水極小六月後又值黃漲各引河內俱有淤淺經大學士公阿桂勘籌料理先於引河匯總處築壩以禦黃蓄清復將通湖各引河派夫上緊挑挖深通使明春重運北上時放水下注以資利濟奏蒙

俞允茲查五道引河內張福口裴家場太平河三道阿桂在工時卽經接續趕辦掣放水平均屬通順後復加展寬深先後核計張福口引河共用銀九千八百三十七兩零裴家場引河共用銀八千九百十兩零太平引河共用銀一萬四百二十三兩零業於十一

續行水金鑑卷五十八

淮水
三

月初旬一律辦竣其張家莊天然引河並經阿桂奏明隨後估挑臣等留心察勘兩處未挑引河停淤之處漸可施工當委淮揚道師彥公參將鄭永泰遊擊田鴻謨等丈量確估張家莊引河需土方銀三千六百四十三兩零天然引河需銀四千五百一十三兩零臣等督飭工員於月之十日內已趕緊挑竣其攔湖壩外太平河尾至裏河運口抽挑溝渠一道以便清水直入運河刷滌浮沙又攔湖壩外迤北下接舊東西壩并由新東西壩直抵黃河抽挑溝渠一道以備來春開放清水暢注敵黃濟運臣等又督率道將等勘估需銀二千五百五十五兩零挑起之士卽以

幫培東水隄工業俱興辦統限年內一律辦竣

南河成案

續行水金鑑卷五十六

淮水
三

續行水金鑑卷五十八終